



**S**igismundus Vuiennæ ex patritia familia natus est, anno circiter 1531. Is cum felici ingenio frueretur, parentum consilio operam literis dedit, atq; prima rudimenta facillimè percepit. Inde uerò in academia album receptus, artibus & linguis incubuit, atq; earum præclaram notitiã acquisiuit. Deinde legum studia priori eruditioni coniunxit, & earum usum sibi familiarem reddidit. Ad hanc eius industriam accedebat religionis amor, atq; uitæ innocentia. Hactenus uerò in Vuiennensi Academia Gradum candidati in uerba Romani pontificis iurabāt, atq; sese Romanæ ecclesiæ obtemperaturos iuramēto affirmabant. Id autem cum Sigismundo

difficilimum esset, apud eius facultatis Doctores impetrauit, ut id ipsi primo remitteretur. Itaq; cum Imperatoris interuenisset authoritas, constitutum ut posthac candidati pollicerentur, sese Catholicæ & Christianæ Ecclesiæ semper subscripturos & obtēperaturos. Id quod pietatis cultores haud grauatim præstant, hoc modo Eyslerus Doctoralia insignia sibi comparauit, atq; sua eruditione & pietate omnibus doctis innotuit. Ea ratione is etiamnum pergit, atq; procul dubio suis uirtutibus efficiet, ut ipsius nomen non modo huic seculo, sed etiam posteritati futurum sit gratissimum.